

A painting of a man with dark hair and a beard, wearing a yellow tunic and a brown shawl. He is holding a wooden staff and is reaching out his right hand towards a small white lamb. The background shows a green hillside with rocks and a blue sky with clouds.

KAKU LAMSU NKHABO

Khataruangkhaibo Watson Goodman

Matha—Jonra leng makge

KAKU LAMSU NKHABO

“KAKU LAMSU NKHABO” haise Masanbo Charao gasu kha maduibo ladriangdung-e. Masanbo Charao gu withubo lamga raokhaibo sira Bible haise siakge chiubo Ira malumme.

“Kaku lamsu” Tingwang ladkeng wangbo haise tacheng matipra lungchun leng mariu charimai leng gengsiakbo-e. Mai khatniu lungli lujiu nuan phutlujiu, Rapiu gasu Khrista tu palungga lungra kusai, khatdi palungchun pakhiangna niu Rapiu Jesu Khrista tu Rankhaipao-e chiujuu malum khaisai, Rapiu papumsiak niu pakhuga paken dikhaibine khatdi pagu ringabo hai agimanaibose malum mai lungchunga pikhai bine. Haise Iniu 1937 ga silujuu maisuang habo Rapiu pagu chakinthiubo gasu Iniu kampang makge. Nangniu haichiu lumak kinsai, Tuhoi gasu pakhuga natu Rankhaipao-e khatdi Rapiu-e chiujuu kamra Iniu nakhuga khengbo-e.

—Watson Goodman (1920-2002)

TINGWANG GU LUNGSABO

1

Rommai 5:8

Chiudi Tingwang niu aliutu de-
jiukha lungsalo chiubo pingao
khai-e, sisera aliu nuan mai thiujiu
bamniuboga Khrista niu aliu leng
shaikhaide.

Johan 13:1

Haise Kenpadbo Ngi masuang
nai si-e. Paniu haibo kadihpiri hai-
tu phutkhai lujiu Papiu khulam
wanglan mine chiubo Jesu niu
si-e. Haibo kadihpiri ga bambo
pagu hinatu paniu lungsa-e, si-
chiujuu paniu paliutu kanambo
wan tangjiu lungsa khaine.

Madukhaibo 1:5

Kadihga chawang maidung riga
chawang khatdi kashaimaidung

ruangganiu manarai kalubo, ma-
lum kabuibo jengdin Jesu Khris-
ta khuganiu lungsabo khatdi agi-
manaibo naliu riga wang kalubo
thiululo.

Johan 3:16

Palamra Tingwang niu kadih-
piri haitu haijiukha lungsakhai-e,
chiubora paniu panah pumlibo
situ pikhai-e, sichiujiu patu
malum mai hina shaimakjiu ting-
theng ringbo daorabo-e.

Jeremiah 31:3

Iniu nda paliutu lenkhai mibo-e.
Israel maidung yo, Iniu naliutu
lungsa saomakjiu bambo-e, sijeng
niu naliutu Iniu lungsabose lenk-
haijiu bamne.

Aliugu tacheng haise dejukha kungbo gulo chiubo maikhhat niudi mangai silakge: Pahai chamaina lunlungga lenkhai mibo-e, sichiujiu Hiupuina ga majibo lenkhai mibo-e, sise mazadungniu ngaomibo-e, patu hai jat hina ruangga dinruan mibo-e, sichiujiu kadihpiri pakhiang naniu malum mibo-e khatdi tinggen lam lusu mibo-e.

—I Timothy 3:16

Mathi 1:22, 23

Haidung hinase Rapiu niu phai-miu kakung khuga dinkhai mibo-se padra leng-e, “Hainih, Liu-changpui khatniu papum ritjiu panah khat lungsune, sichiu pazanse Immanuel chiujuu kune”

(Parambara “Tingwang aliutu maluang bam mine”).

Johan 14:9b, 10a

“... Atu ngao lumai hina Papiu tu ngao lubo-e. Sichiusai nangniu dechiujujiu Papiu tu aliu khuga lenkhailo chiujujiu dinbolo? Philip, nangniu malum makjiuma? Tuhoi hai Papiu khuga bambo-e khatdi Papiu siniu akhuga bambo-e.”

Johan 1:1 nai 14

Kadihpiri dammak gasu Lad-kengse bamniubo-e, khatdi pahse Tingwang nai nchamme. Sichiujiu Ladkeng siniu chamaina lun thiuwangbo-e, khatdi lungsiat nai majibo niu phui lujiu aliu ruangga lungwang-e....

I Johan 4:15

Mai khatniu Jesu hai Tingwang Nahpiu-e chiu dinsai Tingwang pakhuga bamme, khatdi pah Tingwang khuga bammibo-e.

Kolosimai 2:9

Delosai Khrista gu manuanbo lunlungga Tingwang gu lunlung hina bamme.

Isaiah 9:6

Palamra aliu leng ngena khat pikhai bide! Aliu leng piumainah khat lungkhai bamde! Sichiujiu paniu aliugu mawangpao thiurabo-e. Patuse, Maisuang habo, Ladtikhaipao, Kangambo Ting-

wang, Tingthengjeng Piu, Agi-manaibo chawangnah piu chiuijukurabo-e.

Luk 1:35

Maza siniu kenkakge, "Masanbo Hiupuina siniu nariga wangrabo-e, sichiujiu charawang pumtan nariga kiurabo-e. Hajengniu masanbo ngena situ charawang Nahpiu chiuijukurabo-e."

Mathi 17:5

Paniu haichiu dinbamga, kabendo kamuang khatniu paliutu gom majiu lujiu chakhuang khatniu dinne, "Haise Iniu lungsa kakungbo Anahpiu-e, Iniu pakhuga alung kiu-e; paniu kadinbo piulo!"

PAH SAOLO CHIUBO JESU NIU ALIU KHUGA DINKHAI-E

Johan 8:23

Jesu niu paokakge, "Naliura haibo kadihpiri hangga lungbambo mai-e, chiudi Ira kaku lamsu wangbo-e. Naliura haibo kadihpiri gu-e, chiudi Ira haibo kadihpiri gasu makge."

Johan 11:25

Jesu niu pakhuga dinne, "I hai ringsu lanbo khatdi karingbo si-e. Atu malumbo mai siniu shai midi ringabo-e."

Johan 9:5

Iniu kadihpiri ga bamthen, I hai kadihpiri nbiu-e.

"I hai karingbo taruak si-e," chiuijiu Jesu niu paliu khuga

dinne, "Akhuga wangbo pah siniu wadaodi mariu lakge; atu malumbo pah siniu wadaodi chari lakge."

—Johan 6:35

Naliuniu atu katipao khatdi Rapiu chiuijiu ku-e naliuniu kambo hai maji-e, palamra sise I-e.

—Johan 13:13

Jesu niu paokakge, "Iniu naliu khuga pachang siakjiu dinbo-e: Abraham tu mana makhaga I bam niubo-e."

—Johan 8:58

Sijengniu Jesu niu dinlanne, "Iniu naliu khuga pachang palingjiu dinbo-e: Ira milidung gu kamun si-e."

—Johan 10:7

Luk 5:5, 6

Simon niu paokakge, "Katipao, nchun aliu thonsangbo-e, chiudi wadi kamlu makge. Sichiudi nang-niu dinbo saisuijiu Iniu thon-khaine." Paliuniu thonkhai gap-boga chakha kengga thonpadjiu alangse kekra kum mide.

Mathi 14:19-21

Maidung situ chapiu riga ntao kiura pahniu chamtan pi-e; sichiujiu pahniu taruak khuang mangiu nai chakha pui niase thinlujiu, tinggen lam ngangkhangjiu Ting-wang tu thuanne, pahniu taruak khuangse thenpang lujiu khom-maidung tu pikhaide, khommai-

dung niu maidung tu njan khaide. Mai hina tiu magiu kam lude, sigasu tiu malipadbo khommainiu chabeng kariu-ja-nia-kiu khoi madui lanlu-e. Siga tiumaidung npui-nna jao-makjiu mai sang mangiu kumbo-e.

Mathi 20:30 nai 34

Chiusai phuilo, pamik tiatmai khangnia npui mungga bamlujiu Jesu wangkinbo chiulujiu senjiu dinne, "He, Rapiu, David nahpiu, anaitu lungsa khailo." . . . Siniu Jesu niu panaitu lungsajiu panai mik dikhai-e, chiukhai gapda panai mik ngao mine, siga panai pasai suimide.

6 JESU KHRISTA HAI DAMPAO KHATDI RAPIU-E

Chiudi haibo kanambo tingmik lungga panahpiu pen gasu paniu aliu khuga dinkhai-e papen gasu Tingwang niu ting-kadih dambo khatdi damsugogu mania pak-hiang nagu papao thiura Tingwang niu patu kadapad mibo-e.

—Ibrimai 1:2

Palamra Khrista shaikhai mide khatdi ringsulan mide, chiusai pa-hai kashaimai nai karingmai Ra-piu thiurabo leng-e. —Rommai 14:9

Delosai Tingwang niu wahina papen gasu damkhai-e, tinggen lam bambodi, kadihga bambodi, ngao tanglubo, ngao tangmakbo, hiupuina gu pumtandung, papao-dung, mawangpaodung khatdi

pumtan thinmai hinatu Tingwang niu papen gasu khatdi paleng damkhai-e. —Kolosimai 1:16

Papen gasu Tingwang niu mania hina damkhai-e, gandum khat nagadi papen ganiu makjiu dambo ha-e. —Johan 1:3

Sijengniu Israel maidung hinaniu haise masanjiu silulo chiu-bora naliuniu ju-maseng khaimibo Jesu haisiaktu Tingwang niu Rapiu khatdi Messiah pithiu khai-mibo-e. —Tenkam 2:36

Mai hina malum kabuibo piu Tingwang-e, pah naliutu panah-piu Rapiu Jesu Khrista tu majang khat thiu raleng kulune.

—I Korinthmai 1:9

Chiusai chaganniu ruanna tiubo nang dekamjiu nasingnamai piri ga ladjan thiubolo? Khatdi wakata hina, tiubo nang dekamjiu nachi-nanamaitu wajeng chakkhai makjiulo! Tingwang niu aliu matiutu pama suangga ladjan thiurabo-e.

—Rommai 14:10

Sai pasuangga jat hinatu khom madui wangsume, khatdi mili khommai siniu kamidung ruang gasu militu kadatambo kumjiu panu paliutu baonia thiujiu khaitam sune.

—Mathi 25:32

Papiu siniu maikhat tudi paru anna ladjan thiumakge Nahpiu siniu ladjan thiura panu pumtan hina pikhai mide.

—Johan 5:22

Agu kawicham saisuiju, kanambo nai Tingwang niu Jesu Khrista pen gasu mai pakhiang nagu ka-nbaibo maning hina ladjan thiurabo-e.

—Rommai 2:16

Kashaimai nai karingmaitu ladjan thiurabo Tingwang nai Jesu Khrista suangga Iniu naliutu chamtan thiujiu dinbo-e, palamra pahse mawangra chawang kumjiu wangkiune.

—II Timothy 4:1

Sichiujiu pahniu aliutu maidung khuga kawicham dinruanjiu khatdi patuse ringbam mai khatdi kashaimaitu ladjan thiura Tingwang niu kadalubo-e chiujiu din madura chamtan pikhai-e.

—Tenkam 10:42

Ibrimai 5:9

Pahse lui tathui lubo jengniu,
pah kadin piumai hina leng, pahse
tingtheng ringbo rankhaibo phi-
bang thiulude.

Ibrimai 7:25

Sijengniu papen gasu Tingwang
khuga wangmai hinatu paniu
tingthengjiu rankhai ngamme
palamra paniu Tingwang khuga
tingtheng lungjiu paliu leng
khengbamme.

Tenkam 4:12

Juringbose pakhugasu ruanna
daorabo-e; aliutu rankhai ngamra
ting-kadihpiri lungga Tingwang
niu maikhat khugadi pikhai
makge.

Johan 10:9

I hai rengmun si-e. Akhugasu
wangmai hinatu rankhai bine;
paniu tadpad tadngutjiu piu-
buanse daora-e.

Johan 14:6

Jesu niu patu paokakge, “I hai
npui si-e majibo si-e khatdi kar-
ingbo si-e, akhugasu makbo
maikhatdi papiu khuga wanglu
lakge.”

Johan 8:24

Sijengniu naliu khuga Iniu
dinbo-e chiubora naliu nuan ga
naliu shairabo-e, “I hai I si-e”
Chiubo naliu malum maksai naliu
nuan ga naliu shairabo-e.

Kabenbo wangdih ga Tingwang pamaidunggu dam lubuibo thiura naliutu damkhaibo papiu tu chunwijiu thuanlo. Tamiubo pumtan gasu paniu aliutu gukhai-e khatdi paniu lungsabo Nahpiu wangdih ga aliutu juwangkhaide, sichiujiu paniu aliutu khenrang thiukhai bide, sisera aliu nuan situ kuak khai bide. —Kolosimai 1:12-14

I Korinthmai 1:30

Chiudi Tingwang niu Khrista Jesu tu naliu khat thiura pikhai bide, khatdi Tingwang niu Khrista tu aliugu ningting thiura kamkhai bide. Pahniu aliutu Tingwang khuga kam majikhai bide, sichiujiu aliu Tingwang gu ma-

sanbo mai thiukhai bide khatdi khenrang thiukhai bide.

Tita 2:14

Pahniu papumsiak aliu leng pikhai lujiu kawibo kamra machun bammai aliutu kasabo gasu ranpad lujiu, masanmai thiuijiu pamai thiura kamkhai bide.

Madukhaibo 5:9

Paliu luisan thiu-e: “Anah khuanse thusura khatdi pagu madanse lepadra nangra bui-e. Palamra nang kamshat khai mide, sichiujiu nangniu khengkhai mibo nasit siniu Tingwang leng jat hina gasu, chakhuhan hina gasu chakik hina gasu khatdi tajah hina gasu liulude.”

Rommai 5:9

Pazai ganiu aliutu kam mjakhai mibo jengniu, nkiu-kenjiu aliutu Tingwang lungpom gasu rankhai birabo-e.

Ephesamai 1:7

Palamra aliu khenrang thiura khatdi nuandung kuak khaira pazainiu aliutu liu lude.

I Pitor 1:18, 19

Palamra naliu pao-peh khugasu phungwangbo pageng kahabo lunlung gasu naliutu khipad khaira paman pimide chiubo naliuniu sibamme. Haise kachia rangkang kumjiu hamirabo niu makge. Haise paman kungbo

pajam-para habo milipoi, Khrista gu rathak siniu-e.

I Johan 1:7

Chiudi pabiu kabenbo ga tad-bamsai, aliu khatniu khattu akat-jiu aruang kinbo-e, chiusai Nahpiu Jesu Khrista zainiu aliu nuan hina khiu masan lumide.

Ibrimai 9:14

Haichiujiu Khrista zai siniu de-jiukha pi machang khailo! Hiupuina pen gasu Tingwang khuga tathuibo thiuijuu katkhai mide. Pazai siniu gengmakbo racheng gasu aliu lungchunse kam maji khaijiu, ringbambo Tingwang tu machabo gase aliutu piukhai bi-e.

Palamra Tingwang lungsiat pen gasu malum lubo naliutu Rankhai mide. Haise naliuniu matan lubo makge, chiudi Tingwang gu kalen-e. Mai khat niudi chaliang mimakra taten gasu makge.

—Ephesamai 2:8, 9

Malumboniu aliutu kam majikhai mibo duanniu aliu Rapiu Jesu Khrista zan gasu aliu Tingwang khuga agi-manaibo bamme.

—Rommai 5:1

Jesu Khrista khu lamra chagi romdi rommakdi wadi kamlura ha-e, chiudi lungsabo pen gasu wakam kakinbo malum si-e.

—Galatimai 5:6

Tingwang nahmai hinaniu kadihtu ngamlude, palamra kadihtu ngamlubo haira aliu malumbo pen gasu-e.

—I Johan 5:4

Chiudi haidungse raokhaibora Jesu hai Tingwang Nahpiu Messia si-e chiubo naliu malum lura leng-e; khatdi naliu malumbo pen gasu tingtheng ringbo naliu daolura leng-e.

—Johan 20:31

Sijengniu paliuniu pakhuga maniu-e, "Tingwang ten thiura aliuniu degu kam ralo?" Jesu niu paokakge, "Tingwang niu naliutu lunibo sira paniu langkhaibo patu malumbo si-e."

—Johan 6:28, 29

Tathoilui 103:11

Tingpuk siniu kadihpiri gasu kujiu kabam kum, patu pingjiu bammai riga pah lungsiatse diju bamme.

Tathoilui 103:17

Chiudi Rapiu tu pingjiu bammai lengra pah lungsiatse ting-thengjiu bamme, khatdi pagu kawibose chaken hina riga bamme.

Micah 7:18

O Rapiu, nakumbo rah mai khatdi ha-e; nangra ring masiak bammai nahmaidung nuan kuak khaibi-e. Nalungpom sira ting-theng makge, chiudi nalungsiatse aliu riga lenkhaira nachunne.

Tathoilui 108:4

Nagu saomakbo lungsiatse tinggen ga khangtang bamme; nagu malumbuibose tingpuk ditang bamme.

Kiuhiibo 3:22, 23

Rapiu gu saomakbo lungsa nai lungsiatse bamkha-e. Nsuan kasanbo kum, naimik padsao makbo kumjiu.

Tita 3:5

Haise aliuniu kawibo kambo ganiu makge, chiudi pagu lungsa penniu kasanbo ringting gase Masanbo Hiupuina pen gasu aliutu khiukhaijiu mana kasan khai bide.

PAKHUGA WANGRA TINGWANG NIU ALIUTU KUJIU BAMME

13

Mathi 11:28

“Chabang karipbo phungjiu magenthieu chariu mai hina akhuga wanglo, Iniu naliutu pi mathak khai bine.”

Madukhaibo 22:17

Hiupuina nai naopaopui niu dinne, “Wanglo!” Haise kachiумai hina niudi dinlo. “Wanglo!” lunimai hina niu ringbo duise paman thiumakjiu wang lulo.

Isaiah 55:1

Rapiu niu dinne, “Wanglo chariju bammai hina—haiga tadui bamme! Senlan hamai naliu wangjiu katiu liulujiu tiulo!

Wanglo! Jao nai nduisse liu lulo—naliuleng matha pikhai bine!”

Johan 7:37

Kanam thubo khatdi para thiubo ngi naise Jesu niu chapsu lujiu, pakhuan tanjiu dinne, “Charimai hinaniu akhuga wangjiu sak lulo.”

Isaiah 1:18

Rapiu niu dinne, “Tuhoi aliu chalad tap lukhe. Nanuanse tazai kumjiu hengbamdi, Iniu natu kabun kumjiu kam masan khai bine. Nanuan siniu hengmumtik bamdi, Iniu natu ehamigiu kumjiu kamka khai bine.”

Haigasu Tingwang nahmai nai charasabo nahmaitu sitam lubue, mai khat niudi majibo ten thiumaksai makdi pasingnatu lungsa maksai Tingwang khulam suimakbo-e. —I Johan 3:10

Tingwang Hiupuina niu maa-jangkhai bibo maidung hina Tingwang nahmai dung-e. Palamra naliuniu pinglan raleng kabang thiubogu Hiupuina daolubo makge; chiudi naliu Tingwang nahdung thiulura Hiupuina daolubo-e. Haijeng gasu aliuniu "Abba! Apiu!" chiujiu senne!

—Rommai 8:14, 15

Chiusai naliu kadih haiga cha-mai maji kamakmai khatdi kasa-

mai ruang ganiu naliu mao-meng hajiu tinggen ga chahiu chagan kumjiu Tingwang nahmai kama-san mai thiu lulo. —Philipp. 2:15

Sijengniu Rapiu niu dinne, "Naliu simaitu maren lujiu naliu ruanna bam tamsin lulo; khatdi masan makbodung niatulo; chiu-sai Iniu naliutu lukhai bine. Khat-di I naliu piu thiune, sichiuijiu naliutu pi anahpui anahpiu thiuk-haine," Chiujiu Ngamkam-kambo Rapiu niu dinne. —II Kor. 6:17, 18

Chiudi maidung khangsianiu patu lukhai-e, khatdi patu malum khai-e, sichiuijiu paniu paliutu Tingwang nahdung pithiu khaira pumtan pikhai-e. —Johan 1:12

Rommai 13:13, 14

Jao sak maniubo, makhabo mangambo ten kam makjiu n-gi athao thiubo makjiu kabenbo tingmikga lungmai kumjiu matun majjiu lunglulo. Chiudi Rapiu Jesu Khrista gu chari maniase thinsulo, khatdi chamai pumgu tiutek phiubo khatdi chapumgu masen masiabo pitang khaibose kamta milo.

Galatimai 5:19-21

Chiusai chapumgu dinlen khai-e, sisera npui npiu thiubo masan kamakbo, kajitbo; charameng ka-humbo, karah khaibo, marengbo,

n-gi athaobo, manmabo, chalung pombo, paleng sibo, thao masabo, chamiu mareng thiubo; tiusak maniubo, haitu machambo hina ten kam bammai hina Tingwang dihga ngut lakge, chiubo Iniu naliuga raijiu pisikhai mibo kumjiu Iniu tuhoidi naliuga haibo lamga pisikhai masuangbo-e.

Kadincham 23:31, 32

Wadao khatdi jaoniu natu hiammi tulo. Haise luang marenjiu patah tapongjiu bambo sui-e. Pasaibo nai nsuan padsai natu kaniuniu machao khaibo kumjiu bamniu rabo-e.

Jesu niu pakhu paokakjiu dinne, "Nangniu na Rapiu tu nalung pakhiangna, nahiuna pakhiangna khatdi nachun pakhiangna jaojiu lungsa rabo-e." Haise dithubo khatdi nkiu thubo ladrianne. —Mathi 22:37, 38

"...kawibo katipao, tingtheng ringbo daora Iniu dekam ralo?" Jesu niu pakhuga dinne, "Dekamjiu nangniu atu kawibo chiujiu kujiulo? Tingwang makbo mai khatdi kawibo ha-e. Ladrianse nangniu siju bamme: Maitu gi-mane; mai-nao mainahki kiu mane; aga mane; kalik mane; arat mane; napui napiutu chakhuang thiulo!" Sinapiuniu dinne, "Haibo ladrian-

dung hai Iniu nda nating gasu majaui lungkhang mibo-e." Lung-sabo mikkhuanniu phuilujiu dinne, "Nangniu wakhat machang makha-e. Tadlujiu, nagu kabambo hina khai bilo; lung kaklakmai khuga njan khai bilo; si-chiusai tinggen dihga nang kalekwi rabo-e; sichiu lujiu wanglo khatdi asai suilulo." Sinapiuniu haise chiuluboga, pazu kin masuk mide khatdi pachun sajiu tadmine, palamra pase kalek wichang wibo piu-e. —Mark 10:17-22

Nang niu maji-e chiubo npui Seniu kasaibo ga jukhai Sui-e.
—Kadincham 16:25

NALIUTU SONMI TULO

17

Mai khatniudi wadi makbo
chamniu naliutu sonmi tulo, pa-
lamra maicham majai kamakmai
nahdung riga Tingwang lungpom
wang gu-e. —Ephesamai 5:6

Naliuniu chalad situ ka-nkingbo
mai thiu makjiu, kakam maise
thiu lulo. —Jacob 1:22

Tacheng matip makmai tinggen
dihga ngut ngam lakge chiubo na-
liuniu simak jiuma? Naliutu
pikam arat khaimi dulo; kamak-
hamai niudi maksai charameng
kahummai niudi, maksai agahmai
niudi, maksai npiumai karai kasa
kambo mai niudi; maksai ka-ag-
mai maksai maigu kachanginmai,

maksai maniu kanimai maksai
chalad kasa dinmai maitu khan-
mai, maksai maitu kapin tiumai,
Tingwang kadihga ngut lakge.

—I Korinthmai 6:9, 10

Anah maidung, mainiu naliutu
sonmi dulo, mai khatdi maji kam
kinmai pase tacheng matipbo
kumjiu simaidi tacheng matip
rabo-e. Mai khatniu nuan kamsai
para chara kasa gasu-e, delosai
chara kasa sira karai gasu maojiu
bambo-e. —I Johan 3:7, 8a

Chiusai mai khatniu patu walun
makdi paruanna patu wakam lura
maningsai, simaira paruanna
patu sonkinbo-e. —Galatimai 6:3

Rommai 5:12

Sijengniu mai khangkhat gasu
nuan kadihpiriga wangmine,
khatdi nuan gasuniu kashaibo
wang-e, sichiujiu kashaibose
chamai hina khuga wangtangde,
palamra mai hina nuan ten mide.

Jacob 1:15

Sichiujiu masenbo siniu pawan
phungmiboga nuan mana padbo-
e, khatdi nuan siniu dikhangboga
kashaibo padle.

Ezekiel 18:20

Nuan tenbo hinase shairabo-e.
Papiu niu kamaobose panahpiu
niu, maksai panahpiu niu kamao-
bose papiuniu phunglakge tacheng
matipbo mai riga tacheng

matipbose bamrabo-e, khatdi
kasa kammai riga kasa kambose
bamrabo-e.

Chamaina maning sira kashai-
bo-e, chiudi Hiupuina gu man-
ingra karingbo khatdi agi-manai-
bo-e. —Rommai 8:6

Sichiudi aliu chunwijiu matha-
rabo-e, palamra nasai kariupiu
haisira shaimibo-e. chiudi tuhoi
pah ringwang lanbo-e; pahai ha-
mibo-e, chiudi tuhoi patu daolan
lubo-e. —Luk 15:32

Majibo kamra machun bammal
ringrabo-e chiudi kasabo ngam
kamra matan bammaira shairabo-e.
—Kadincham 11:19

Luk 7:14, 15a

Sichiujiu pahniu tatingse dikhaiboga situ ponkinmai mathak mine. Jesu niu dinne, "Akhangpiyo, Iniu nakhuga dinbo-e, sumilo!" Siga kashaibo piu sumine, chiuja npao sumi-e.

Johan 11:43, 44

Haichiujiu paniu dinkhai lubosai, pakhuan tanjiu ku-e, "Lazar, npatlo." Siga paphi pabense ratman lujiu khatdi pazuse domkhai bambose palunjiu npat sude. Sichiujiu Jesu niu paliu khuga dinne, "Patu khipad milo khatdi pitad khailo."

Johan 10:17, 18

Papiu siniu atu lungsa-e palamra Iniu paliutu lukhai lan lura agu ringting pikhai-e. Mai khat niudi agu ringting hai akhu gasu lulan ngam lakge. Iniu akhenarang thiujiu pikhaibo-e. Iniu pikhaira khatdi lulan lura agu pumtan bamme. Haise apiuniu atu pikhai mibo chamtan-e.

Madukhaibo 1:18

Khatdi Ira ringbambo si-e, Ira shaikhai mibo si-e, chiudi phuilo! Ira tingtheng ringbam mine. Amen. Khatdi I kashaibo nai charuidih gu khamten thiujiu.

Tajaidung 5:7-21

“Atu makbo chara kakitu
kahum mak rabo-e.

“Tinggen lamdi, maksai kadih-
piri gadi, maksai kadih hang tadui
hang gadi naliu charameng kam
mak rabo-e. Naliuniu charameng
suangga makhumkiu mak rabo-e
khatdi kahum mak rabo-e, pala-
mra I hai Rapiu na Rawang-e, . . .

“Kasabo lamga azan hai thin
mane, palamra azan thin maomai
hinatu Rapiu na Rawang Iniu sa-
jai pirabo-e.

“Mathakbo nai haitu thin ma-
sanjiu n-nid silo, palamra Rapiu

na Rawang Iniu natu chamtan
pibo-e. Nangniu taten thiura jeng
charuk bamne . . .

“Napui napiutu chakhuang thiu
silo, palamra Rapiu na Rawang
Iniu natu chamtan pibo-e . . .

“Nangniu maitu gimak rabo-e.

“Nangniu makhamak rabo-e.

“Nangniu agah mak rabo-e.

“Nangniu mai khat tudi arat
dinmak rabo-e.

“Nangniu naki ningmai naotu
luni mak rabo-e; nangniu pakitu,
palutu, pabangtu, pakhaoruitu,
maksai pagu bambo situ masia
mak rabo-e.”

Jeremiah 23:24

Mai khatniudi Iniu ngao ngam makbo gasu nbai ngamra ha-e. Tinggen nai kadihpiri pabam hinaga I bamme chiubo naliuniu simak jiuma?

Kadincham 15:3

Rapiu niu pabam hina phui bamme; aliu niu kawi kam bamdi, kasa kam bamdi pah aliutu phui-jiu bamme.

Tathoilui 139:8 nai 12

Iniu tinggen lam khangdi, nang siga bamme Iniu charuidi lam kiu nang siga bamme. Tamiubo sidi

nanglengra tamiu suan makge, nchundi n-nien kumjiu bamne nalengra. Tamiubo nai kabebose nalengra macham kamme.

Luk 8:17

Baikhai kami hinara khoilen kamrabo-e khatdi mahimbo hinara kabeboga lenkhai kamrabo-e.

Job 34:21, 22

Paniu maihina phikemse phui-jiu bamme. Tingwang khugasu nuan mai khatniu bai ngam lura-bo tamiubo wakhat gadi ha-e.

CHARA TU SIMAKMAITU TINGTHENG KAM MATHADRABO

Mathi 13:41, 42

Chamai Nahpiu siniu pagu mazadung tu langpadjiu pawang kadih gasu maidungtu nuan ga jukhaijiu bammai khatdi kasabo tenmai hinatu khom maduijiu, paliutu chami taobambo chami-jaiga thonkhai rabo-e, siga paliu kapjiu paliu hiu n-giat bamne.

Mathi 18:8

Nbenniu maksai nephiniu namalumtu kam maha bamsai, sise danthon milo! Nben nia, nphi nia bamjiu midlan makbo miga thonkhai mibo suang nben khat maksai nphi khat hajiu karingboga ngutboniu wi nkieu-e.

II Pitor 3:7

Chiudi tuhoi bambo tinggen nai kadihpiri haise, chaminiu kam mahara sibo Tingwang gu chamtanniu bambo-e. Haise charatu simakbo maidungtu ladjan thiu-jiu khatdi kam maha mirabo tingmik leng khaibambo-e.

Tathoilui 9:17

Tingwang tu lukhai makmai, kasamai hina malan sira kashai-bo-e.

Mathi 25:46

Chiujiu tingtheng mathadbo bamga paliu wang bammide, chiudi tacheng matipmaira tingtheng karingbo bammine.

II Pitor 2:9

Sichiujiu charatu simaitu de-chiujiu paliugu magenthak gasu gukhaira khatdi kasamai situ ladjan thiubo tingmik leng dechiu khaibam ralo chiubo Rapiu niu sijiu bamme.

Ibrimai 9:27

Mai hinase pawan khat gara shaisiak rabo-e, khatdi sibo sailam Tingwang niu ladjan thiubabo-e.

Tenkam 17:31

Palamra kadihpiri pakhiang-natu majibo siniu ladjan thiura pahniu tingmik khat riatkhai lujuu pahniu mai khattu kadakhai bamme. Sichiujiu pahniu maihi-

na khuga sibo piu situ kashaibo gasu piringsu khai lanjiu lenkhai bamme!

II Korinthmai 5:10

Delosai Khrista niu ladjan thiubo bamga aliu wangkam rabo-e, siga aliu haibo pum lunlungga kamkhai mibo kawibodi kasabodi aliu maihina phijeng ngaokam rabo-e.

Rommai 14:12

Chiusai aliu mathiu paruanna pagu-pagu Tingwang masuangga pirabo-e.

I Johan 4:17

Ladjan thiubo nai aliu machang lura lungsajiu bamkhe, palamra pakumjiu aliudi kadihga bambo-e.

Rommai 5:15

Mai khangkhat nuan jengniu mai kakeng shaide chiubo majibo-e. Chiudi Tingwang gu lungsiat sira nkiu-nkenjiu dibo-e, hai-chiujiu chamai khangkhat chiubora Jesu Khrista lungsiat duan-niu mai kakeng khuga Tingwang gu kalen wang-e.

Rommai 9:16

Chiu-e sai, wapakhiang nase chamai khatgu masanbo maksai ngamkam saisui makge, chiudi Tingwang gu gukhaibo saisuibo-e.

I Pitor 5:5b

... Tingwang niu chaliang mai-tu khamme, chiudi lung manon maitu lungsakhai-e.

Tenkam 4:33

Ladlangtadmaidung siniu pum-tan jaojiu Rapiu Jesu ringsulan mibo lamga jengdin thiu-e, siga Tingwang niu paliu mathiu riga thoidam dijiu pikhai bide.

II Korinthmai 9:15

Dinsilakbo pagu kalen jengniu aliu Tingwang tu thuankhe.

II Korinthmai 8:9

Palamra naliuniu aliu Rapiu Jesu Khrista gu chalungsabo tu sibamme, chiubora para kakhiu-mai thiubam liudi naliu leng wilura kaphiu jengniu kalek-kasa-mai thiumine, khatdi pah ka-lek-kasamai thiu kabi jengniu naliu kalekwi mine.

Maidungniu simakbo wan haitu
Tingwang niu phuitom khai lujiu,
tuhoira mai hinatu paliu npui
kasabo gasu lunglira pahniu
chamtan pikhaijiu bamme.

—Tenkam 17:30

Pachangjiu chiumakge! Iniu naliu khuga dinbo-e chiubora naliudi
naliu nuan gasu lunglilu maksai
paliuniu shaimibo kumjiu naliudi
shairabo-e. —Luk 13:3

Sijengniu, lungli lulo, khatdi
Tingwang khulam mariwang lulo,
sichiusai pahniu naliu nuandung-
se kuak khai bine. —Tenkam 3:19

Pitor niu paliu khuga dinne,
“Naliu maihinaniu panuan nuan

gasu maripad lujiu Jesu Khrista
zan gasu tadui nphum lulo, sichiusai
naliu nuandungse kuak khai
bine khatdi naliuniu Tingwang gu
kalen Masanbo Hiupuina daolune.”

—Tenkam 2:38

Naliu nuan gasu, lungli lulo, palamra Tinggen kadihse nawang
mide, chiuijiu panu dinne.

—Mathi 3:2

Delosai Tingwang luni kumjiu
chalung magenthiubora chalung
kali lujiu juringbo ngao ra-e, khatdi
sibo jengniu wadaodi chalung
niumilak; chiudi kadihgu luni
kumjiu chalung magenthiubora
kashaibo ngaone.

—II Korinthmai 7:10

Mathi 6:14

Naliu khuga maokhai maitu na-liuniu kuak khai bisai, tinggen lam bambo naliu piuniu naliu tudi kuak khai birabo-e.

Ezekiel 18:21

Kasabo mai khat siniu nuan kamlan makjiu, agu ladrian-dungse majai lujiu, kawibo khatdi majibose kamsai, pah shailakge; pah maomakjiu ringrabo-e.

Madukhaibo 3:20

Phuilo, Iniu kamunga chap lu-jiu akham maganjiu bamme; mai khat kumboniu akhuan chiu lujiu, akham lekhaisai, Iniu kalung lam ngut lujiu patu maluang tiune, di pahniu atu maluang tiune.

Isaiah 55:7

Kasamai siniu paliu luniung thonlujiu, paliu maningse kali milo. Paliutu aliu Rapiu Ting-wang khuga pimariwang milo; palamra pahra lungsasibo khatdi kuak khai sibo piu-e.

Tenkam 5:31

Tingwang niu paben jatlamsu patu piring khai lujiu Jupao khat-di Ranpao pithiu khaijiu, Israel maidung lunglibo wan pikhaijiu paliu nuan kuak khai bide.

Mark 2:5

Jesu niu paliu malumse dejiuga dilo chiubo ngao lujiu papumphan shaibo piu khuga dinne, “Anayo, na-nuandungse kuak khai mide.”

Tita 2:11, 12

Palamra Tingwang gu lungsiat maihinaga juringbo phungwang-bose madulen khai bide. Aliuniu Tingwang simakbo khatdi kadih lunlung masia makjiu, chalung thinriakjiu tacheng tadjiu khatdi Tingwang maningga haibo kadihpiriga lungra lungsiat hainiu aliutu kati khaide.

Kolosimai 3:2

Naliuniu kadihpiriga bambo makjiu kakulam bambo maniaga naliu chun khai lulo.

Ephesamai 5:11

Chiuiju tamiubo maidung pasi masi kamakbo dungtu majang

chaka thiutulo, sibosung paliu maomeng dinlen bilo.

Isaiah 1:16

Naliu ruanna kam masan lulo. Iniu naliu ngamkam kasa hina ngaobambo haigasu saomilo. Yo, kasabo kamta milo.

I Johan 2:15, 16

Kadihtu khatdi kadihgu maniadungtu lungsami tulo, maikhat niudi kadihtu lungsa-e sai, papiutu lungsabo pakhuga ha-e. Chiussai kadihga kabambo hina chappum makhabo, amikgu makhabodung, khatdi alung kadi thiubo pakhiangna hai, papiu khugasu makge, di kadihpiri gasu-e.

Ezekiel 36:26

Iniu lungchun kasanbo khatdi maning kasanbo naleng pikhaine. Nalungchun katanbose Iniu luthon lujiu kadin piubo lungchun naleng pikhai bine.

I Johan 2:29

Khrista majibo-e chiubo naliuniu sisai majibo kamkinbo-e, khatdi majibo kammai sira Tingwang nah-e.

I Johan 5:18

Mai khatniu Tingwang gasu mana kasan lumai thiusai nuan kam lakge, chiubo aliuniu si-e; khatdi Tingwang Nahpiuniu patu sankhai bi-e, siniu patu kasaboniu kam masa lakge.

II Korinthmai 5:17

Sijengniu mai khat kumboniu Khrista ga bamme sai, para kasanbo gandamme; kaguangbo hinase tonmide, phuilo, mania hina sankam mide.

Johan 3:3

Jesu niu paokakge, "Iniu nak-huga pachang paling dinbo-e, mana kasan lanlu makmai khat niudi Tingwang kadihse ngaolu lakge."

I Pitor 1:23

Palamra ringjiu bambo khatdi tingtheng ringbo Tingwang ladkeng siniu halanbo makjiu halan lakbo puipiu khat nadung kumjiu naliutu mana kasan lude.

Ephesamai 2:1 nai 6

Karai gara naliugu kamao kameng khatdi kadinpiu makbo jengniu naliu hiupuina ga shaibam niu-e... chiuju aliutu pi Khrista nai ringsu ncham lujiu, tinggen dihga Khrista Jesu bamga aliutu ntao aruangra kamkhai mide.

Kolosimai 3:1

Naliuniu Khrista tu maluang ringsu machamlu mai-e sai, kakulam bambo maniatu phiu-lulo, siga Tingwang benjat lamse Khrista ntao bamme.

I Pitor 2:24

Aliu nuanse Khrista niu papum paruanna singchai ga phungkhai

mide, sichiujiu aliuniu nuanga shaikhai lujiu tacheng matipboga lunglu raleng pahniu ajambo jam siniu naliutu wikhai bibo-e.

Galatimai 5:24

Khrista Jesu gu thiulu mainiu chapumgu masenbo hai singchai-ga gensat mide.

Rommai 6:2 nai 11

Palingjiu chiumakge! Aliu nuan ga shaikhai mide dechiujiu aliu nuan ga lungbam ngamlu ralo? ... Haise kumjiu naliudi naliu ruanna makumtao lujiu nuan ga shaibo, chiudi Khrista Jesu pen gasu Tingwang khuga ringbam-bo-e.

Delosai naliu pumleng maruk mainiu naliu pum gasu kashaibo gelan sune, Hiupuina leng maruk mainiu Hiupuina gasu tingtheng ringbo gesune. —Galatimai 6:8

Mose nai ramjingga tataginiu kambo kaniutu jumaseng khaimibo kumjiu Mai Nahpiu tudi jumaseng surabo-e. Sichiuijiu patu malum mai hina tingtheng ringbo ngao lune. —Johan 3:14, 15

Mai khat kumboniu Nahpiutu malumme sai tingtheng ringbo daolude; mai khat kumboniu Nahpiutu malum maksai ringbo daolakge, chiuijiu Tingwang gu sajiga bamne —Johan 3:36

Tingtheng karingbo chiubora nanghai khatnakha bambo majibo Tingwang si-e, khatdi nangniu langkhaibo Jesu Khrista tu silura chiubo-e. —Johan 17:3

Nuan phijengra kashaibo-e; chiudi Tingwang niu aliu Rapiu Jesu Khrista gasu pikhaibo kalen sira tingtheng karingbo-e.

—Rommai 6:23

Iniu naliu khuga pachang paling dinbo-e. Maikhat kumboniu alad chiuluijiu atu langkhaibo patu malum lumai hina tingtheng ringbo daolune patuse ladjan thiudai lakge, chiudi kashaibo gasu karingbo lam kenpad mide.

—Johan 5:24

Isaiah 32:17

Maihinaniu majibo tenbo duan-niu, agi-manaibo khatdi manang makbose tingthengjiu thiumi rabo-e.

Galatimai 4:6

Chiusai naliu panahmai thiulu-bo duanniu Tingwang panah Hiupuina aliu lungga langkhaibo siniu Abba, Apiu chiu senne.

Johan 14:21

Agu chamtantu lukhaimai khatdi majibo pase alu lungsaboe. Atu lungsamai hinatu Apiuniu lungsakhai bine; Iniudi patu lung-

sajiu apumsiak madulen khai bine.

Rommai 8:16

Aliu Tingwang nadung-e chiubo din madura Tingwang Hiupuina niu aliu hiupuina ga nkhakhai-e.

I Johan 3:18, 19

Sichiusai aliuniu aliu cham, aliu ladniu makjiu, ngamkam nai maji-boniu lungsakhe.

I Johan 4:13

Haigasu aliu silu-e, chiubora aliuniu pakhuga bamsai, pah aliu khuga bamme; palamra paniu aliu leng pagu Hiupuina pikhaibi-e.

32 LUNGCHUNGA BAMBO KHRISTA GU CHUNWIBO

Johan 17:13

Tuhoira I nakhu lam wangkine, sichiujiu paliu khuga agu chunwibo hai phuijiu bamlura Iniu kadihpiriga haise dinkhaibo-e.

Rommai 14:17

Palamra Tingwang kadihse tiubo khatdi sakbo makge, chiudi Hiupuina ga tacheng matipbo, agi-manaibo khatdi mathabo-e.

Isaiah 12:3

Kacharimai khuga taduiniu chunwibo phungwangbo kum, Tingwang niu pamaidungtu rankhai biboga paliu chunwi-e.

Atu Khrista nai majangjiu singchaiga masengsat mide, khatdi I ringkinbose I makjiu, alungga

bambo Khrista niu-e khatdi tuhoi chamai kumjiu lungkinbo alunlung haise malumbo ganiu lung kakin gu-e, kamalumbo sise atu kungjiu ajengniu papum khai kabibo Tingwang Nahpiu tu malumbo si-e.

—Galatimai 2:20

Iniu naliu khuga haise dinkhabora naliuniu agu chunwiboga bamlu raleng-e, khatdi naliugu chunwibose tingtheng lura leng-e.

—Johan 15:11

Karingbo npui gase nangniu atu jukhai bine; nangniu atu majang bambo jengniu achun wijiu bamne, khatdi na-nkha siniu tingtheng chunwibo phungwang-e.

—Tathoilui 16:11

Chiudi naliuniu Rapiu kadin piumakjiu khatdi pakhuan king-khai maksai, pahniu naliutu khat-di naliu wangtu atung rabo-e.

—I Samuel 12:15

Naliuniu maikhat kadin piune chiujuu pikhai misai sibo piu bang thiuh mibo-e, kashaibo patrabu nuan bangdi sui-e, maksai Ting-wang khuga kam majikhaibo kadin piubo bang thiudi sui-e, chiubo naliuniu masanjiu si-bamme.

—Rommai 6:16

Chariu khengbo gasu naliu tudi aliutudi pahniu pimathak khai bine. Haise Rapiu Jesu tinggen lamsu pagu ka-ngambo mazadung nai wangboga pikhai birabo-e.

Tingwang tu lukhaimak maidung khatdi aliu Rapiu Jesu gu kawichamtu majaimak maidungtu chami puangniu kam mathad bira-bo-e. Paliutu Rapiu niu pakendibo ka-ngambo bam gasu pibam tam-khai lujiu tingthengjeng harabo mathadga pibam khaine.

—II Thessalonimai 1:7-9

Thoidam nai tasiang kadara Iniu thainai naliu khuga pikhai-e-naliuniu Rapiu naliu Rawang ladrian majaisai thoidam daone, chiudi haibo ladriandung hai naliuniu majai maksai tasiang daorabo-e, haise Iniu naliu khuga thainai chamtan thiujiu dinbo-e.

—Tajaidung 11:26-28a

Philippimai 2:11

Chiusai Tingwang kendira jengniu chamai lih hinaniu Jesu Khrista hai Rapiu si-e chiujiu din madu padle.

Mathi 10:32, 33

Mai khatniu mathiu suangga pase agu-e chiujiu din madu pat-sai, Idi paduan jengniu tinggen lam Apiu masuangga patu din madune. Chiudi mai khatniu mathiu suangga atu lukhai maksai, Idi tinggen lam Apiu masuangga patu lukhai lakge.

Rommai 10:9, 10

Nangniu Jesu se Rapiu-e chiujiu madu padsai khatdi Tingwang niu patu kashaibo gasu piringsu

khaimibo-e, chiujiu malumsai palung chun gasu malumme khatdi haichiujiu kam majikhaibi-e, khatdi pamunniu din madu padle khatdi haichiujiu rankhaibi-e.

I Johan 2:23

Saokum mainiu Nahpiu tu suimak sai Papiu pakhuga ha-e; saokum mainiu Nahpiu tu lukhaisai papiuse pakhuga bamme.

Luk 9:26

Mai khatniu aduan jengniu khatdi acham duanniu mangam sai, chamai Nahpiu niudi pamenken diboga khatdi Masanbo mazadung masuangga khatdi Papiu maken diboga wangdasai mangam rabo-e.

I Pitor 5:8

Kaden siju akhe bamlo! Naliugu mikrebo Devil siniu marajiu bambo nduangqui khat kumjiu, maitu kajuangra phiu bamme.

II Thessalonimai 2:9

Kasabo piu wangbo tingga Satan gu pumtan thinwangjiu katam-tambo, aratbo, tasibo nai maisuang habo kamsu rabo-e.

Mathi 4:1 nai 10, 11

Sigasu Devil niu Jesu tu hiamra Hiupuina niu ramjinglam puitad mide . . . siga Jesu niu paokakge, "Satan, tadmilo." Masanbo Ariakniu dinne, nangniu narapiu Tingwang tu ruanna kahum rabo-e khatdi pangam ruanna kam

rabo-e. Sigasu Devil niu Jesu tu phudkhaide; khatdi mazadung niu wangjiu patu nkha khaide.

Ephesamai 6:11

Naliuniu Satan gu paru kasabo tu sun ngamlu raleng Tingwang ripon hina piululo.

Tenkam 26:18

Nangniu paliu mikse tamiubo gasu kabenbo pingao khai rabo-e khatdi Satan pumtan gasu Tingwang pumtan pingao khai rabo-e; sichiujiu paliuniu atu malum ludasai paliu nuanse kuak khai bine khatdi Tingwang niu kadalu maidung ruang gase paliu bam daolu rabo-e.

Chiusai kasabo piu patuse mадukhai mine, sibo tingga Rapiu wangjiu pamun gasu padbo pasiu ganiu patu kamsatjiu kam mahami rabo-e. —II Thessalonimai 2:8

Sijengniu naliu Tingwang cham phunglo, khatdi chara kasabotu sunlo, chiusai pah naliu khugasu pak mine. Naliu Tingwang khuga manawang lulo chiusai pahdi naliu khuga manawang khai bine.

—Jacob 4:7, 8a

Paniu paliutu tatia nai tazaigu namaidung kubo kum, Jesu papumsiak paliu kum mibo-e, khatdi paliu chamaianagu lunlung gase luncham khai mide. Paniu haise tenkhai-e chiusai paniu shaibo pen

gasu kashaibo ga pumtan bambo Devil patuse paniu kam mahami raleng-e. —Ibrimai 2:14

Sichiusai aliutu Khrista gu lungsabo gasu kampang ngambo sao bamlo? Chalungchun, chariubo chaphai-tani habo niuma, kappingbo niuma, maksai kashaibo niuma? . . . chiudi aliutu lungsa khaibibo Rapiu duanniu palam hinaga aliura kangam maidung suang nkieu-e.

—Rommai 8:35 nai 37

Mai khatniu nuan kamsai, para chara kasa gasu-e, delosai charakasa sira karai gasu maojiu bambo-e, haibo charakasa ten kam mahara Nahpiutu madulen wangbo-e.

—I Johan 3:8

Mai khatniu, pah Tingwang tu lungsa-e chiulujiu, pasingnatu marengsai para arat mai-e, palamra mai khatniu ngaobambo pasingnatu lungsa makjiu ngao makbo Tingwang tu lungsa silakge.

—I Johan 4:20

Iniu chamaina lad khatdi mazadung lad hina dinsi bamdi, lungsabo hasai, kakding bambo siamtoi kumbo-e.

—I Korinthmai 13:1

Naliu khuga lungsabo hai bambai, mai hinaniu naliu hai akhommaidung-e chiubo silu rabo-e.

—Johan 13:35

Chiudi Hiupuina rasira lungsa-bo, mathabo, agi-manaibo, kheng-

sibo, njangbo, kawibo, malumbo, manonbo, papum thinman lumi-e. —Galatimai 5:22, 23a

Luanniabo thiujiu Jesu niu pakhuga din lanne, "Johan nahpiu Simon, nangniu atu lungsa monma?" Paniu paokakge, "Yo, Rapiu Iniu natu lungsa-e chiubo nangniu siju bamme." Jesu niu pakhuga dinne, "Agu milidung tu akhi khailo."

—Johan 21:16

Aliu singna maitu lungsabo jengniu aliu kashaibo tu kenlujiu karingboga npad mibo-e mai khatniu maitu lungsa maksai kashaboga pah bam kha-e.

—I Johan 3:14

Tenkam 10:39-41

Paniu Israel mai kadihga khatdi Jerusalem ga kamkhai mibo hinagu aliuniu jengdin-e. Sichiujiu paliuniu patu singchai rigasu natri gianjiu kamsat kamigu-e. Chiudi Tingwang niu patu jengsum saiga kashaibo gasu juringkhai bijiu ngaolen khai-e, chiudi maihina khuga makjiu Tingwang niu kadalumai, chubora paniu kashaibo gasu ringsu lanbo saiga, tiu, macham sakmacham mimai aliuniu jengdinne.

Johan 20:26-28

N-nid kak khat saiga, khommaidungse akham lujiu bam aruang bamboga, Thomas di paliu

raungga bamme. Akhamse khamten khai nbamme, chiudi Jesu niu paliu ruangga wang chap lujiu dinne, "Naliu khuga agi-manai bamlo." Sigasu paniu Thomas khuga dinne, "Naben kario padlo khatdi aben hai phuilulo, naben nthapadjiu alepga kamed khailo. Nalung makbose thiu talo, khatdi malum lulo!" Thomas niu patu paokakge, "Arapiu khatdi Arawang!"

Mark 16:9

Jesu niu kashaibo gasu ringsulan lubo saiga, Nidnai nsuan kalu paniu rasa chinnia hathonpad mibo pui, Magadalene Mary khuga lenkhai raithu-e.

Mathi 16:21

Sibo tinggasu Jesu niu pak-hommaidung khuga masanjiu dinne, "Iniu Jerusalem lam tadra-bo-e, sichiujiu khangkiang mai-dung, singkupidung, khatdi Ta-cheng-tajai gu katipaodung khu-gasu I magenthieu khengrabo-e. Atu kamsat khaine, chiudi pa-sumbo nai I ringsulan rabo-e."

Johan 5:28, 29

Haiga naliu suangha midulo; palamra kashaimai siniu pakhuan chiurabo wanse wangkinne. Si-chiujiu paliuse paliu rao gasu npadrabo-e. Kawibo tenkhaimi mai-dung siniu ringsujiu lungbam

mirabo-e, khatdi kasabo tenkhai-mi maidung siniu ringsujiu ladjan thiurabo-e.

Rommai 6:3-5

Khrista Jesu ga tadui nphum mibo aliu mathiu, Rapiu gu shai-boga tadui kiukhai mibo-e chiubo naliuniu simakma? Aliu tadui nphumbo ganiu, aliu pah-panai shaiboga nphum ncham khai mide, chiusai Rapiu kendibo ganiu Khrista tu shaibo gasu piring sulan mibo kum aliudi kasan-bo ringtingga lungmi raleng-e. Palamra aliuniu Rapiu niu shaik-hai mibo aliga khat thiukhai misai Arapiu gu ringsulan mibo gadi khat thiurabo-e.

Luk 1:74, 75

Aliutu mikre maidung khugasu jupad khai bine chiujiu ladrian thiukhai-e, khatdi aliuniu ping-makjiu patu akhira-e, sichiuijiu aliu hai pasuangga masan-ra-e khatdi nchang jiu bamra-e, aliu ringtingga.

II Korinthmai 7:1

Haibo ladriandung bambo jengniu akamaidung aliu pum nai aliu Hiupuina tu kam taniabo hina gasu aliu ruanna kam masan lujiu Tingwang tu pingboga masan tathui lukhe.

II Timothy 2:21

Sichiuijiu maikhat kumboniu kasabo hina gasu paruanna kam

masan lusai, patu kakungboga thinkhaine, palamra pahra kat-padmibo papaoniu thinra, kawibo ngam kam hinaga thinra kaden lubo-e.

I Pitor 1:2

Naliutu Papiu Tingwang niu maningbo saisuijiu khatdi pagu Hiupuina Masanbo mai pithiu khaira, khatdi Jesu Khrista zai siniu khiu masan lujiu pah kadin piuraleng kadakhai mibo-e. Lungsiat nai agi-manaibose naliu khuga phuijiu bamlo.

I Pitor 1:15

Sibosung, naliutu kubo Tingwang se masanbo kumjiu naliuniu kambo hinaga masan lulo.

Isaiah 35:8

Siga npui kadibo khat bamme, pajanniu, "Masanbo Puidi" ku-e. Nuan mai khatniudi sibo puidi riga tadmari lakge. Kapangmai khatniudi siga ngutsi lakge.

Ibrimai 13:12

Sise kumjiu Jesu niudi pazainiu maidungtu nuan gasu khiu masan lura namdi lenlam shaikhai mide.

I Johan 1:9

Chiudi aliuniu aliu mao dinpad bisai, aliu nuan kuak khaira khatdi aliu mao hina gasu kam masanra, Rapiu pahra malumbuibo khatdi kamajibo-e.

Mathi 3:11

Naliuniu lunglibotu lenra Ira naliutu tadui gasu nphum khaibo-e, chiudi asailam wangkinbo paniu naliutu Masanbo Hiupuina nai chami gasu nphum khaibi rabo-e. Paseasuang di nkiu-e. Ira paphitop juradi akaji makge.

Ephesamai 1:4

Kadih dam makhabo masuang gasu aliu Khrista nai khat thiura Tingwang aliutu kadalude, si-jengniu aliu pama suangga kamao hajiu khatdi aliu masanjiu bamkhe.

Haijiukha naliuniu sajiu bamdi, naliuniu namaidung khuga kawibo pikhai raleng si-e. Sichiusai, tinggen lam piu paniu khengmai hina khuga Masanbo Hiupuina se pikhaibi rabo-e! —Luk 11:13

Chiudi Masanbo Hiupuina siniu naliu riga kiukhai bisai, naliu khuga pumtan niu phuimi sune, sichiusai aduanjeng gasu naliu . . . lamchap thiurabo-e. —Tenkam 1:8a

Chiudi Tingwang gu Hiupuina niu palingjiu naliu lungga lungbamme sai, naliu hai chamaina lunlungga lungbo makge, chiudi Hiupuina gu lunlungga lungbo-e. Maikhat kumboniu

Khrista gu Hiupuina pakhu bammak sai, para pagu makge.

—Rommai 8:9

Iniu ahiupuina se naliu khuga pikhai bine khatdi Iniu naliu khuga pikhaibo ladrian hina naliu majaijiu piura Iniu phuikhai bine.

—Ezekiel 36:27

Antioch ga malum maidungse chunwibo nai Masanbo Hiupuina niu phuijiu bamme.

—Tenkam 13:52

Sichiujiu paliuniu khengloiboga, paliu madui bambo bamse malaiwang-e. Paliu mathiuse Masanbo Hiupuina niu phuiluijiu Tingwang chamse hujiu dinsude.

—Tenkam 4:31

Tathoilui 34:18

Palungchun nkhinmai khuga
Rapiu ra najiu bamme. Paliu chun
hami maitu paniu gukhai bi-e.

Isaiah 66:2

Ting-kadihpiri pakhiangna I
apum siakniu damkhaibo-e! Atu
pingjiu khatdi alad majaijiu
lungmanon mai khatdi palung ka-
limaitu Iniu achun kimme.

I Pitor 4:12, 13

Akamaidung yo, naliuniu ma-
genthiu chariu khengbambo hai
wa katambo kumjiu naliu suang-
ha mitulo. Chiudi Khrista gu

chariu khengbo naliuniu phung
macham bambo jengniu chunwi
bamlo, palamra pagu paken
pangam dibo madubo naise na-
liudi chunwiboniu phuimi rabo-e.

Madukhaibo 21:4

Siga paniu paliu mik gasu paliu
mikdui nunsang khaine, siga ka-
shaibodi bamlan lakge, chalung
chariubo, kakapbo thiuniubo
bamlan lakge. Karaibo mania
hina kui mide.

Tathoilui 37:3

Rapiu tu malumjiu kawibo
kamlo, wadi manang makbo
ramga lunglo.

Khatdi tuhoira kahiambo ga ngutkhai maitu paniu nkha ngamme, palamra pah papumsiak kahiambo daojiu chariu khai kamigu-e.

—Ibrimai 2:18

Watheng makjiu agi-manaibo bamra Tingwang niu Satan tu naliu phi hangga thonkhai bine.

—Rommai 16:20

Kawimaidi wajiu kha chariu magenthiu-e chiudi Rapiu niu patu wahina gasu gukhai-e.

—Tathoilui 34:19

Nangniu tadui kasukbo kenjiu bamdi Iniu natu maluang bamne; nagu chariu magenthiubo siniu natu nammi lakge. Nangniu

chami jiuga tadjiu bamdi, natu rumi lakge; katanbo gu kamadiubo siniu natu wakhatdi kam masa lakge.

—Isaiah 43:2

Tingwang niu pamaning saisui-jiu kulumai khatdi kadalumai hina lengra wa pakhiangna wikan najiu tadkiu lura Hiupuina siniu kamkhai-e.

—Rommai 8:28

Naliuniu khenglu lakbo siniu wangjiu naliutu hiamkhai makha-e, chiusai Tingwang ra malum kabuibo-e khatdi pahra naliu kheng kalakbo kahiambo naliu riga khaibi lakge, sichiubo makjiu kahiambo kawangbo luan naliu khenglu raleng paniu pumtan pikhai bine.

—I Korinthmai 10:13

Madukhaibo 3:12

Ngamlu maitu Iniu Apiu Tingwang rakiga katiang khat pithiu khai bine, sichiuijiu pah si-gasu wadaodi tadpatlan lakge. Iniu pariga Arawang zan, Arawang gu namdi zan, Arawang kadih gasu wangkiurabo Jerusalem kasanbo zan, khatdi azan kasanbose raokhai bine.

Madukhaibo 3:5

Sichiuijiu ngamlumai situ kaka-bo puan piukhai bine, di karingbo ariak khuang gasu paliu zan luthonmi lakge. Paliuse amai-dung-e chiubo Iniu Apiu masuangga khatdi pagu mazadung masuangga madujiu dinpadne.

Madukhaibo 3:21

Iniu ngamlujuju Apiu wangbam-ga tuhoi Apiu mungga ntao bam-bo kumjiu, ngamlumai hinatu awangbam gase, amungga ntao macham bamra pikhai bine.

Madukhaibo 21:7

Kangambo paniu haibodung hina lune di Iniu pagu Tingwang thiune, di paniu anahpiu thiune.

Madukhaibo 2:7

Phumlingdungga Hiupuina niu dinbose pakon kathiu hinaniu chiu lulo! Kangambo patu Ting-wang gu paradise ga bambo saili singbang gasu tiura Iniu pikhai bine.

I Korinthmai 7:10, 11

Chiudi kalekthiu kamimai khuga Iniu makjiu Rapiu niu haichiu dinne, panaoniu pakinatu mah mitulo. Chiusai paniu tad mine chiudi chami thiulan tulo; sichiu makjiu pakina nai chun juanlujiu aruanglan milo; khatdi pakina niudi panaotu tah dulo.

Panaotu talujiu kaki npuimaitu lulan maise makhabo-e; khatdi tamibo puitu lulan maidi makhabo-e.

—Luk 16:18

Din rambaboga, npuimai mai-nao thiubo pui khatniu karing-then pakhuga tacheng-tajainiu pirat khaijiu lung-e; chiudi pakina

shaimi sai pakina gu pirat khaibo tacheng tajai gasu paniu pachun parang thiumi rabo-e. Haichiujiu pakina ringjiu bamboga, pase kakibo npiumai khat khuga lungmisi, patu kamakhabo pui chiu kurabo-e; chiudi pakina shaimi sai paniu pachun parang thiuboga bamjiu kakibo npiumai khat khuga milanjiu tadi pah makhabo makge.

—Rommai 7:2, 3

Chiudi tuhoira Iniu naliu khuga dinbo-e, panaoniu makhabo makjiu, mai khatniu panao tadi, pase milan misai, makhabo-e; khatdi mai khatniu takhaibo puitu lulan-sai padi makha mibo-e.

—Mathi 5:32

Sichiujiu Iniu tadlujiu naliu leng pabamse kaden lusai, Iniu bambo bamga naliudi bamra I malan wangjiu naliutu puine.

—Johan 14:3

I wangji sune. Nakhuga bambo kangambo gu tathuanse mai khatniudi sutmi makra thin matip lulo.

—Madukhaibo 3:11

Sichiusai, mai khatniu aduan jengniu khatdi agu kawicham jengniu, haise charatu simakbo khatdi kasabo ken-ga mangam sai, chamai Nahpiu siniudi paken-dibo Papiu nai masanbo maza-dung masuangga wang dasai, pa-duan jengniudi mangam rabo-e.

—Mark 8:38

Chiujiu chamai Nahpiu gu ma-dan tinggen lamsu maduwang sune. Chiusai kadihga jat hina paliu gah jumjiu kapsune. Sai chamai Nahpiu pumtan nai ken-dibo thiujiu kamuang riga tong-lujiu wangkinbo paliuniu ngao sune.

—Mathi 24:30

Naliudi naliu lung khengsijiu bam lulo, naliu lung matipjiu bamlo; delosai Rapiu tingmikse namide.

—Jacob 5:8

Delosai tinggen lamsu ting-kalik khaijiu, tingbang lamdi ngaobo kumjiu, chamai Nahpiu wangrabodi sikum siak sune.

—Mathi 24:27

Singnamai, aliu tuhoira Ting-wang nahmai mide, di pasai dechiu suralo simasan lulakge, chiudi patu madulen wangsai, aliudi pakum misune chiubo sibamme; delosai aliu patu ngao-bo kum siakjiu ngao sune.

—I Johan 3:2

Phuilo, I ka-agamai kumjiu wangkinne. Papumruangjiu tad-makra, lenlam papumruang len-makra, paphai pani kaden lujiu khuanbam maise paduan wi-e.

—Madukhaibo 16:15

Sichiujiu naliudi kadensi siakjiu bamlo, palamra chamai Nahpiu naliuniu maning makjingbo ting-ga wangrabo-e.

—Luk 12:40

Chiuiju dinne, “Galilee mai-dung, dekamjiu naliu chaplujiu tingpuk lamse phuijiu bamjiulo? Haibo Jesu, naliu khugasu ting-gen lam lusu mibo haitu paniu tinggen lam khangmibo naliuniu ngaobo kum gapjiu pah wanglan rabo-e.”

—Tenkam 1:11

Palamra chamai Nahpiu niu Rapiu gu kendiga pagu maza-dungtu maluang lujiu maihina ngamkam saisuijiu paphijeng piraleng wangkiune.

—Mathi 16:27

Sibosai chamai Nahpiu siniu pa-kendibo nai pumtan jaojiu ka-muang rigasu wangne.

—Luk 21:27

TINGWANG LADKENG

Luk 21:33

Tinggen nai kadihra hamine,
chiudi aladdung haira wadaodi
halakge.

Mathi 22:29

Chiudi Jesu niu paliutu pao-
kakge, Masanbo Ariak khatdi
Tingwang gu pumtan simakjiu
naliu mao mide.

II Pitor 1:21

Palamra phaimiu kakunggu
champao haise chamaina man-
ing gasu wadaodi padbo makge,
chiudi Tingwang khugasu wang-
bo champaose paliuniu dinboga

Masanbo Hiupuina siniu mai-
dung situ thinman mibo-e.

II Timothy 3:16

Masanbo ariak hinase Ting-
wang niu pikhaibo-e, haichiui
haisiniu majibo katikhaira khat-
di tacheng matipjiu lungra lad-
din khai rabo leng-e.

Tathoilui 119:11

Iniu nagu tacheng-tajai alung-
ga khai-e chiusai Iniu nakhuga
nuan kamkhai lakge.

Tathoilui 119:105

Naladkeng hai atu majangra
chamibung khatle, khatdi a-npui
leng kabenbo khatle.

8-22 SI

210 Liangmai Naga HFA